



**"Naalackersuisut sermimik imermillu avammut nioqquteqalernissamut pilersaarussiaat pillugu nassuiaat 2004-imersoq"-mut malinnaatitsissummik nassuiaammik kingusinnerpaamik UKA2017-imi saqqummiusseqqullugit Naalackersuisut peqquneqarnissaannik Inatsisartut aaliangiiffigisassaattut siunnersuut.**

**(Nalunaarusiarineqartussap takussutississavai siunissami imermik sermimillu nunanut allanut nioqqutissiortalernissamut aporfiusinnaasut aammalu nunarsuarmioqatigiit niuerfissuini niuernerpalaartumik unamminarsinnaasut nalunaarsussallugit. Nalunaarusiap aamma ersersissavaa sermimik imermillu avammut niueruteqarnissamut avungangaaq pilersaarussiaq, imermik avammut niueruteqarnermi maannamut misilittagaalersimasut aallaavigalugit).**

(Inatsisartunut ilaasortaq Jess Svane, Siumut)

Siullermik qujanaq siunnersuuteqartumut Jess Svane Siumut

Inuit Ataqatigiinni pingaartilluinnakkatta ilagaat Nunatsinni pissarititaanik atorluaanerulluta nutaanillu eqqarsarluta aningaasatigut ineriartortitsinissaq, avammut tunisassaarnermi aammattaaq nunamut imminut pilersorniarnermut. Tamannalumi politikikkut suliniutigineqartuarsimasut ilagilluinnaraat. Taamatullu Naalackersuisunut kaammattuutaajuassalluni pingaartitatut suliniutigineqartuarnissaa.

Ilumoorluinnarpoq Nunatsinni imeq kuuginnartoq sermerlu annertoq pigaagut atorluarnerusinnaasatsinnik. Nunatsinni inuussutissarsiutigalugu ineriartortittuagassarput. Kisiannili ullumimut aporfeqartarsimavoq, nunatta iluani aamma avammut tunisassiatut iluatsiffittut annertuuliutissaanani.

Naalackersuisup akinerani eqqaaneqartut ilagaat avammut tuniniarnerani assartorneranilu aningaasartuutit annertusarnerat aporfiusarsimasoq, taamaattumik nunanut allanut unammillernissaq ajornakusoorluni. Taamatutaaq nittarsaanneqarnissaanut assersuutigalugu Coca cola-kunnut unammillernissaq ajornakusoortutut oqaatigineqarluni.

Piumagaannili imermik avammut tunisassiorneq ajornannginnerulersinneqarsinnaavoq pisariittumik aqqissuussinikkut, ullumikkut assersuutissaqqissummik tikkuagassanik arlalinnik peqarpoq. Qeqertarsuarni imeq pitsaalluinnartoq ukiorpassuarni iluatsinneq ajortoq eqqarsaatigalugu, akitsuusersuinerit pitsaavallaangitsut niueruteqarluni tunisassiorniarnermi akornutaasunut ilaalluinnarpoq Royalties-p ullormi siullermiit eqqunneqarnera, taanna aamma arlalinnik akornutaasoq takusareerparput soorlu aatsitassarsiornermi.

Taamaattumik akileraaruseriuseq ullutsinni eqqarsaatigilluakkamik aaliangiiffiginissai kaammattuutigilluinnarpagut Naalackersuisunut.

Uani imeq eqqarsaatigiinnaraanni nunatta avataanut annertuukkaarlugit tuninianermiluunnit uagutsinnut eqqortaratta taamaalillutalu soorlu Pisiffik, Pilersuisoq Brugsen-kullu akikinneriorlutik nuna allamiut imermik nioqqutissiaannik pisiinnartariaqalersarput.

Ullumikkut emballageafgifteqarpugut puiasamut ataatsimut 3,50 kr. assersuutigalugulu assartuussinermut 1,40 aningaasartuutigineqartarsimappat taassumalu qaavatigut Royalties ltr-mut 0,10 øre tassa imeq ltr. -mut nioqqutissiatut pisiariniaraanni afgiftiinnagajannut 5 kr. imaa pinnagu, qallunaat imiliaat immererlugu taassuminnga akikinnerusarporluunnit.

Sanilitsinnut Islandimut qviassagutta imeq tunisassiariniarnerani akitsuusersugarinngilaat, nunaqartunut sulisussaqtitsiniarnermut atorneqarluni. Sooq uagut aamma tamanna anguniassanngilarput?

Siunnersuuteqartummi tunngaviisa ilagaa suliffissaqartitsiniarneq imermik sermermillu tunisassiornermi inuiaqatigiinnut pingaaruteqartumik inissinnissaa. Tassuunakkut nunatta aningaasarsiornikkut siuariaataanissaa qulakkeerumallugu, tamanna Inuit Ataqtigiinni anguniagassatut isumaqatigilluinnarparput.

Siunnersuut soqutigalugu inuussutissaqarnermut ataatsimiitsitaliamut ingerlateqqipparput. Qujanaq